

V

Koblenzer Mundart:

Der Jubilar

Fier fuffzig Jahr en treue Deenste,
do wierd dä Mensch geacht, geehrt,
met Worte, jo de Allerscheenste,
dat ä ze Träne es gerehrt.

Die Zeidung brengt dann em Lokale,
e Kommentar met Foto raus,
bluhß seht dä Jubilar, dä ahle,
en Wärklichkeit vill jinger aus.

Mer scheckt em Blome on Geschenke,
och Gleck on Seje met der Post,
su mancher doht seiner gedenke -
von dem ä lang nix hat gewoßt.

En Dank, dä pletzlich kimmt en Masse,
get ons e knefflich Rätsel off:
Worom doht mer zesammefasse,
wat johrelang es offgeloff?

Em Lewe hat dä Mensch oft Zeite,
wo ä paar warme Worte brüucht,
e Lob kann alles dann bedeute,
dä Onmot wierd domet verscheucht.

Drom soll mer öfter en Etappe,
anstatt ze waarte fuffzig Jahr,
ganz ehrlich besje Schmus verzappe,
dat botzt die „Treefste Tasse“ klor.

Omjubelt wierd bei der Premiere
su oft dä gruhße Kino-Star.
Doch keiner brengt zom jubiliere,
mol vur der Zeit - „dä Jubilar“!

Katharina Schaaf

Katharina Schaaf
veröffentl. am 29. 8. 64